

DE MAASGOUW

Orgaan voor Limburgsche Geschiedenis, Taal- en Letterkunde.

PRIJS PER JAARGANG:

Voor Nederland 2 gulden.
« België 5 franken

Advertentiën: 10 cent per regel.

Dit blad verschijnt 2 maal per maand onder bescherming van het Provinciaal Genootschap voor geschiedenis en oudheidkunde in Limburg.

De nadruk van artikels, buiten toestemming der schrijvers, is verboden.

Abonnementen, brieven en mededeelingen te bezorgen bij de uitgevers **BOOSTEN & STOLS**, Achter t'Vleeschh. 39, Maastricht
Abonnementen worden eveneens ontvangen bij alle postkantoren en boekhandelaars.

Testament van Henrich van Belen, priester te Weert 1530, 6 Mei.

In den naam des Heeren. Amen. Doer dit tegenwoordich Instrument sij allen menschen kennelyc ende openbaer dat inden jaer der gheboorte ons Heeren duijsent vijfhondert dertich den sesden dach des maents Meij omtrent vijf uren nae middach ter derde Indictië des Pausdoms onser alderheiligste Vaders in Christo ende Heeren Clement doer die godlycke voersiechticheit den sevende Paus van dien naem in synen sevende Jaer — in tegenwoordicheit mijns openbaer Notarij ende ghetuyghen naebescreven constitueert der weerdige man ende Heer Henryck Belen, priester des bisdomps van Luyck, woenachtich inde stadt Weert ghesont van herten, sijner sinnen machtich, reden ende verstandt hebben niet tegenstaende dat hij wenich met crancheit des lichaem was bevangen, overdenckende dat is allen menschen geordineert eens te sterven ende gheen dinck onsekerer dan die ure des doots, willende ghenieten die Licentie van onsen eerweerdichste Heer den biscop van Luyck oft synen Official gegeven ghelyck ghebleecken heeft bij brieven daer van ghexpedieert ende besegelt. Nae die selfste Licentie willende van sijn tijtelycke guederen hem van Godt verleent disponeren ende die salicheit sijner sielen besorgen op dat hij en soude connen te sterven sonder sterven, In alle beste maniere, wech, recht, stijle ende redene als hij cost ende moeste, heeft ghemaect sijn tegenwoordich testament ende leste willen in forme ende maniere als volcht. Inden eersten syn siel die beter is dan allen tijdelycke dingen beveelt hij Godt almachtich Marie syne onbevelecte moder ende allen den hemelsche Heer ende heiligen, begherende dat men Uutvaere matelyck naeden staet van enen priester sonder pomperye nae synen doot sal halden ende celebreren. Noch maect testamentmaecker voers. voer syn

onbekendt ende onrechtelyck vercregen goet oft hij bij avontueren sullyck enich hadde, der Fabrijske van S. Lambrecht binnen Luyck nae synen doot enen stuver munte van Brabant eens te betaelen, des ghelycken den voer biddende Orden ellycke enen stuver eens te gheven, den Capellaen ende den Custer ellycke twee stovers eens te betaelen. Daer nae heeft Testateur voerscreven ghemaect ende gheordineert ter eeren van Godt ende tot salicheit syner sielen ende syner alderen sielen twee missen ten eeuwige daghen inder kercken van Overweert opden altare van Sinte Loij ende Elizabeth ghecelebreert te worden: tot wellycke missen heeft der selvighe Heer Henrych ghegeven ende gheassigneert hondert golt gulden oft die rechte weerde daer voer, wellycke penningen hebben die recteurs van den voers. altaer ontfangen ende daer met iaerlycxen renten oft censen ghecocht tot behoefte ende dienst der voers. twee missen, ende den dienst van dese missen maect hij Heer Jan Sottens met deze conditie: Indien dat heer Peter Artsen oft enighe kinderen van Lijsbeth van Keelst priesters woerde, soe sullen totten dienst van deser missen voer Heer Jan Sottens aenghenomen worden, ende moghen heer Jan oec niet van den dienst afwerpen ten sij datt sy selven bedienen ende der dienaar sal allen die renten ontfangen sonder contradictie, ende der dienaar sal oec voor hem selven broet ende wijn besorgen, ende sullen oec altijd die naeste bloetverwanten inden dienst van dese missen succederen. Item wilt den Testateur voerscreven indien dat nemant van den voerscreven tot desen dienst recht wolde pretenderen, ende die selve niet erlyck en leefde noch en diende, in dese gevall sullen die recteurs van den voerseide Altaer enen anderen erlijcke ende well levende priester in plaetse van dese mogen stellen. Noch wilt testateur voers. dat oft quaem dat den dienst Gods inde kercke van Weert doer ketterije oft doer mandaet oft letsel van den Heer des lants oft in enighe

andere manier int geheel oft in enen deel vercort woerde (1) sullen alsdan die voers. renten comen totter tafelen des Heilige Geest tot behoefte der armen. Noch heeft ghemact voers. testateur der kercke van S. Merten binnen Weert thien horns gulden voer den bouwe, den Minrebroders te Weert oeck sou veel, half totter kercke ende halft totter cuecken. Noch heeft testateur ghemact tot reparatie van Sinte Elizabeth ses hornsgulden, den susters op de Biest vierden halven horns gulden. Noch heeft ghemact gheordineert ende gegeven testateur voers. der tafelen vanden Heilige Geest binnen Weert in behoefte der armen sestich golt gulden goet van ghewicht die wellycke sculdich sijn den voers. testateur die inwoenderen van den dorp Buck bij Gulre inden lande van Luyck die uut te deilen ten ewigen dagen inden vasten in broet ende harinck, ende dese uitdeelinghe sal syn van twee en dertich aelmossen ende ellycke almoesse van twee stuvers een ort munte van Brabant, ende sol reteren noch thien stuvers waer van die mombers van den Heilige Geest, ende voer die anderen seven doen singen op S. Elizabets dach een misse met enen priester ende rector vander scolen, ende des sondachs daer nae salmen singen vigilie van drie lessen ende capellaen sal 'tzelfste van den stoel ropen. Noch wilt testateur voers., dat Wilm soen van Gordt van Keelst ende Elizabeth sijne huijsvrouwe sijn petenen sal die renten van dese gulden verteren ende ontfangen ten tijde van sijn leringhe seven jaer lanck, diewellycke als gheyndt syn sullen alsdan ewelyck die mombers des Heilige Geest van dese geven die portie als voers. ende die rentbrieven sullen altyt bewaeren die selfste mombers, ende quaemt dat dese renten woerden gelost, sullen alsdan die mombers anderen copen met die selve pennicken. Item het huijs daer in wcent meester Wilm Chijrurgijn met sijn toebehoer geeft hij Marie sijne nichte, ende Bastiaen Colen haeren man met allen den last, beheltelyck, dat hij assigneert heer Henrych den testateur een erfmalder rogen ende Bastiaen nae doot des testateurs sal hebben acht horns gulden uut die guederen van den testateur.

Dese copia is gescreven uut en originalen brief oft Testament van Henrych Belen, ende uut den Latyn in duijtsche spraek overgesadt van wordt tot wordt soe verre mogelyck was doer my Andream Driessen Notarium publicum.

WEERT

Fr. Dalmatius O. F.F. M.M.

(1) Wij vestigen de aandacht vooral op dit voorgevoel een naderende godsdiensttroebelen, welke uit deze woorden spreekt.